

Regierung – 03.05.2018

D'Regierung, oder op Franséisch de *Gouvernement*, ass de Kär vun der exekutiver Gewalt vum Staat. D'Regierung ass déi exekutiv Gewalt, wëll si déi Gesetzer, déi am Parlament gestëmmt goufen, ëmsetzt.

D'Regierung besteet aus engem Regierungschef – zu Lëtzebuerg ass dat de Premierminister oder d'Premierministesch. Dem Premier hëllefe Ministeren a Ministeschen, déi fir verschidde Beräicher zoustänneg sinn, wéi zum Beispill Bildung, Landwirtschaft oder Aussepolitik.

An den demokratesche Länner ginn d'Deputéiert fir d'Parlament direkt vum Vollek gewielt. Op der Basis vun de Resultater vun deene Wahle gëtt dann eng Regierung gebilt. Wéi d'Memberen aus der Regierung bestëmmt ginn, hänkt awer vum politesche System of an ass doduerch jee no Land ënnerschiddlech.

An den USA zum Beispill sicht de Staatschef, also de President oder d'Presidentin seng Regierung aus.

An enger parlamentarescher Monarchie, wéi bei eis zu Lëtzebuerg, gëtt de Premier normalerweis vum Staatschef, bei eis also vum Grand-Duc, op der Basis vum Resultat vun de Wahlen nominéiert. Hien oder si ass dann de Formateur an huet d'Aufgab eng Regierung zesummenzestellen. D'Memberen aus der Regierung komme meeschtens aus de Koalitiounsparteien. Et kënnen och Leit an d'Regierung kommen, déi net bei de Chamberwahle vum Vollek gewielt goufen. An der Regel ass dee gréissten Deel vun de Memberen allerdéngs virdrun an d'Chamber gewielt ginn.

D'Parteien, déi sech an der Regierung zesummendinn, hunn an der Regel eng Majoritéit am Parlament. Dat heescht, si hunn zesummen méi wéi d'Hallschent vun den Deputéierten an der Chamber. Esou eng Regierung nennt een eng Koalitiounsregierung, well se aus enger Koalitioun tëscht zwou oder méi Parteien besteet. Et kann awer och sinn, dass just eng Partei d'Majoritéit am Parlament huet an all d'Membere vun der Regierung stellt. Dat nennt een dann eng Majoritéitsregierung. Eng drëtt Méiglechkeet ass d'Minoritéitsregierung. An deem Fall huet d'Partei, déi d'Regierung stellt, keng direkt Majoritéit an der Chamber. Si muss allerdéngs vun anere Parteien an der Chamber ënnerstëtzt ginn, fir un d'Muecht ze kommen a mat Parteien aus der Oppositioun zesumme schaffen, fir Gesetzer an der Chamber ze stëmmen. Dës Form vu Regierung ass déi seelenst, well et fir d'Regierung vill méi schwéier ass, hire politesche Programm ëmzesetzen, soulaang si keng Majoritéit am Parlament huet.

Säit dem Enn vum Zweete Weltkrich gouf et zu Lëtzebuerg nëmme Koalitiounsregierungen mat zwou oder méi Parteien.

Mee wat genau mécht d'Regierung iwwerhaapt?

Jee no politeschem System kënnen d'Memberen vun der Regierung ënnerschiddlech Aufgaben a Verantwortungen hunn, déi vun der Verfassung vum jeeweilige Land definéiert ginn. Zu Lëtzebuerg leet d'Regierung z.B. déi verschidde Ministèren, verwalt d'Ausgaben an d'Akommes vum Staat a schléit an der Chamber Gesetzer vir. Déi lëtzebuergesch Ministere mussen d'Interesse vum Land bei der europäescher Unioun verrieden. All Minister këmmert sech dobäi ëm säi speziell Thema, wéi z.B. Transport, Ëmwelt oder Gesondheet. Déi wichteg Entscheedungen an der Regierung ginn an der

POLITIKLEXIKON



Regel zesumme vun alle Regierungsmembere am Regierungsrat getraff. Zum Beispill musse Gesetzesprojeten am Regierungsrat ugeholl ginn iert se un d'Chamber kënne weidergeleet ginn. Gläichzäiteg ass d'Regierung awer och verantwortlech fir all Decisioun, déi se zesummen am Regierungsrat trëfft.

D'Regierung dierf also net alles. Fir dat sécherzestellen, gëtt si vun aneren Institutionen oder Gewalte kontrolléiert, virun allem vun der Chamber. Wann d'Regierung hir Muecht mëssbraucht, kann d'Chamber si ofsetzen oder Ministeren ukloen. Am Prinzip kann ee soen, dass soubal méi wéi d'Hallschent vun den Deputéierte sech géint d'Regierung stellt, et immens schwéier fir d'Regierung gëtt, un der Muecht ze bleiwen.

Och wat d'Kontroll vun der Regierung ugeet, ass et jee no Land verschidden. A Groussbritannien zum Beispill muss de Premierminister oder d'Premierministesch sech all Woch eng hallef Stonn laang de Froe vun den Deputéierten am Parlament stellen.